

欽  
定  
全  
唐  
文

欽定全唐文卷六百七十二目錄

白居易 十七

得甲居蔡曰寶人告以爲僭不可入官訴云僂句  
不余欺是以寶之

得甲畜北斗龜財物歸之遂至萬千或告違禁詞  
云名在八龜

得甲去妻後妻犯罪請用子蔭贖罪甲怒不許  
得辛氏夫遇盜而死遂求殺盜者而爲之妻或責  
其失貞行之節不伏

得乙與丁俱應拔萃乙則趨時以求名丁則勤學  
以待命互有相非未知孰是

得丁冒名事發法司准法科罪節度使奏丁在官

有美

集作善

政請免罪授真以勸能者法司以亂

法不許

得乙上封請永不用赦大理云廢赦何以使人自

新乙云數赦則姦生恐弊轉甚

得景居喪年老毀瘠或非其過禮景云哀情所鍾  
得辛奉使遇昆弟之仇不關而過爲友人責辭云

銜君命

得軍帥選將多用文儒士兵部詰其無武藝帥云取其謀也

得甲至華嶽廟不禱而過或非其違眾甲云禱非禮也

得乙隱居徵辟不起子孫請以所辟官用蔭所司不許

得江南諸州送庸調四月至上都戶部科其違限訴云冬月運路水淺故不及春至

得景爲縣令教人煮木爲酪州司責其煩擾辭云  
以備凶年

得丁爲郡守行縣見昆弟相訟者乃閉閤思過或  
告其矯辭云欲使以田相讓也

得甲獻弓蹲甲而射不穿一札有司詰之辭云液  
角者不得牛戴牛角

得乙有同門生喪親將往弔之其父怒而撻之使  
遺縑而已或詰其故云交道之難

得轉運使以汴河水淺運船不通請築塞兩岸斗

門節度使以當軍營田悉在河次若斗門築塞  
無以供軍

得景爲宰秋雩刺史責其非時辭云旱甚若不雩  
恐爲災

得丁爲郡歲凶奏請賑給百姓制未下散之本使  
科其專命丁云恐人困

得戊兄爲辛所殺戊遇辛不殺之或責其不悌辭  
云辛以義殺兄不敢返殺

得甲爲將以簞醪投河命眾飲之或非其矯節甲

曰推誠而已何必在醉

得乙有罪丁救以免乙不謝或責之乙云不爲已  
得景妻有喪景於妻側奏樂妻責之不伏

得甲年七十餘有一子子請不從政所由云人戶  
減耗徭役繁多不可執禮而廢事

得景於逆旅食噬腊遇毒而死其黨訟之主人云  
買之有處

得詔賜百僚資物甲獨以物委地而不拜有司劾  
其不敬云本賊物故不敢拜

得乙爲大夫請致仕有司詰其未七十乙稱羸病  
不任事

得景爲縣官判事案成後自覺有失請舉牒追改  
刺史不許欲科罪景云令式有文

得甲替乙爲將甲欲到乙嚴兵守備不出迎發制  
書勘合符以法從事御史糾其無賓主之禮科  
罪不伏

得鄉老不輸本戶租稅所司詰之辭云年八十餘  
歲有頒賜請預折輸納所司以無例不許



得乙女將嫁於丁旣納幣而乙悔丁訴之云未立  
婚書

得景請與丁卜丁云死生付天不付君也遂不卜  
或非之

得耆老稱甲多智縣司舉以理人或云多智賊也  
未知合用否

得乙爲邊將虜至若涉無入之地監軍責其無勇  
畧辭云內無糗糧外無犄角

得景進柑子過期壞損所由科之稱於浙江楊子

江口各阻風五日

得丁喪所知於野張帷而哭鄰人詰云夫子惡野哭者

得甲妻於姑前叱狗甲怒而出之訴稱非七出甲云不敬

得乙爲軍帥昧夜進軍諸將不發欲罪之辭云不見月章

得景嫁殤鄰人告違禁景不伏

得丁陳計請輕過移諸甲兵省司以敗法不許丁

云宥罪濟時行古之道何故不可

得甲在獄病久請將妻入侍法曹不許訢稱三品  
以上散官

得乙聞牛鳴曰是生三犧皆用之矣問之皆信或  
謂之妖不伏

得丁母乙妻俱爲命婦每朝參丁母云母尊婦卑  
請在婦上乙妻云夫官高不合在下未知孰是  
得景請預駙馬所司糾云景德子也且違格令欲  
科家長罪不伏

得甲夜行所由執之辭云有公事欲早趨朝所由以犯禁不聽

得郡舉乙清高廉使以爲通介無常罪舉不當郡稱往通今介時人無常乙有常也

得景於私家陳鐘磬鄰人告其僭云無故不徹懸得丁氏有邑號犯罪當贖請同封爵之例所司不許辭云邑號不因夫子而致

欽定全唐文卷六百七十二

白居易 十七

得甲居蔡曰寶人告以爲僭不可入官訴云僂句  
不余欺是以寶之

魯道寢微守臣喪職眷茲臧氏代稱冢卿方構禍於家門  
始有誣於內子問則以默察而愈欺理異斬關而放跡同  
據邑之請三年一兆旣徒稽於大蔡始僭終吉彼何幸於  
纖人故帝舜格言唯先蔽志宣尼垂範數而爲黷則知禍  
福無門通塞唯數焉有性命之理存乎卜祝之間若廢興

之道適然是善惡之徵一貫人與僭而不入因君子之明刑

得甲畜北斗龜財物歸之遂至萬千或告違禁詞

云名在八龜

財無苟得義不厭取若奉業以往積而無傷或非道以行動且爲害於稽爾甲爰契我龜已見負圖不獨七星之號空嗟入夢詎終千載之期是諸侯之寶念彼當畜非宗伯之屬其誰敢私豈伊匪人妄致諸櫝迹罔厠於主守家用寶於神龜徵以從長占八九之數窮於旣厭收千萬之盈

茲乃多藏且不豫於官事靡嘗知禁亦可畏於人言必曰  
職我之由守而勿失名可覆視余無爾刑

得甲去妻後妻犯罪請用子蔭贖罪甲怒不許

二姓好合義有時絕三年生育恩不可遺鳳雖阻於和鳴  
烏豈忘於反哺旋觀怨偶遽抵明刑王吉去妻斷絃未續  
孔氏出母疎網將加誠鞠育之可思何患難之不救況不  
安爾室盡孝猶慰母心薄送我畿贖罪寧辭子蔭縱下山  
之有怒曷陟屺之無情想芣苢之歌且聞樂有其子念葛  
藟之義豈忍不庇於根難抑其辭請敦不匱

得辛氏夫遇盜而死遂求殺盜者而爲之妻或責

其失貞行之節不伏

親以恩成有讎寧捨嫁則義絕雖報奚爲辛氏姑務雪冤  
靡思違禮勵釋憾之志將殄萑蒲蓄許嫁之心則乖松竹  
况居喪未卒改適無文苟失節於未亡雖復讐而何有夫  
讐不報未足爲非婦道有虧誠宜自恥詩著靡他之誓百  
代可知禮垂不嫁之文一言以蔽無效尤於邾婦庶繼美  
於恭姜

得乙與丁俱應拔萃乙則趨時以求名丁則勤學



以待命互有相非未知孰是

立已徇名則由進取修身俟命寧在躁求智乎雖不失時  
仁者豈宜棄本屬科懸拔萃才選出羣勤苦修辭乙不能  
也吹噓附勢丁亦恥之躁靜旣殊性習遂遠各從所好爾  
由徑而方行難強不能吾捨道而奚適觀得失之路或似  
由人推通塞之門誠應在命所宜勵志焉用趨時若棄以  
非葑失則自求諸已儻中其正鵠得亦不愧於人無尚苟  
求盡嘉自致

得丁冒名事發法司准法科罪節度使奏丁在官

有美

集作善

政請免罪授真以勸能者法司以亂

法不許

宥則利淫誅則傷善失人猶可壞法實難丁僭濫爲心僥  
俛從事始假名而作僞咎則自貽及勵節而爲官政將何  
取節使以功惟補過請欲勸能憲司以仁不惠姦議難亂  
紀制宜經久理貴從長見小善而必求材雖苟得踰大防  
而不禁弊將若何濟時不在於一夫守法宜遵乎三尺盡  
懲行詐勿許拜真

得乙上封請永不用赦大理云廢赦何以使人自

新乙云數赦則姦生恐弊轉甚

刑乃天威赦惟王澤於以御下存乎建中上封以宥過利  
淫倖門宜閉大理以盪邪除舊權道當行皆推濟國之誠  
未達隨時之義何則政包寬猛法有弛張習以生常則起  
爲姦之弊廢而不用何成作解之恩請思砭石之言兼詠  
蓼蕭之什數則不可無之亦難

得景居喪年老毀瘠或非其過禮景云哀情所鍾  
孝乃行先則當銜恤子爲親後安可危身景喪則未終老  
其將至懷荼蓼之慕誠合盡哀迨桑榆之光豈宜致毀所

以爰資肉食唯服麻纁况血氣之旣衰老夫耄矣縱哀情之罔極吾子忍之苟滅性而不勝則傷生而非孝因殺立節庶畢三年之喪順變從宜無及一朝之患旣虧念始當愧或非

得辛奉使遇昆弟之仇不鬪而過爲友人責辭云

銜君命

居兄之仇避爲不悌銜君之命鬪則非忠將滅私而奉公宜棄小而取大辛時惟奉使出乃遇讐斷手之痛不忘誠難共國飲冰之命未復安可害公節以忠全情由禮抑未

失使臣之體何速諍友之規與駢立言嘗聞之矣子夏有問而忘諸乎是謂盡忠于何致責

得軍帥選將多用文儒士兵部詰其無武藝帥云取其謀也

忘身死節誠重武夫制敵伐謀則先儒士將籌策而可尚奚騎射之足稱軍帥明以知兵精於選將以爲彎弧學劍用無出於一夫悅禮敦詩道可宏於七德功宜保大理貴從長若王師之有征以謀則可苟戎畧之無取雖藝何爲况晉謀中軍選於義府漢求上將舉在儒流豈惟我武惟

揚誠亦斯文不墜元戎舉德未爽能軍兵部執言恐爲辱國

得甲至華嶽廟不禱而過或非其違眾甲云禱非禮也

嶽則配天自修常事神雖福善安可苟求宜率道以去邪豈從眾而失正甲志惟守義言乃合經以爲視以三公實天子之所饗降其百福寧匹夫之可禳如修蘋藻之誠是用粢稗之禮況人之僭濫徒欲乞靈而神實聰明豈歆淫祀非鬼是爲諂也黷神無乃吐之旅於泰山古猶致誚禱

於華嶽今豈不非諒正直之難誣雖馨香而勿用將勸來者所宜救歟

得乙隱居徵辟不起子孫請以所辟官用蔭所司不許

修身獨善寵則若驚制爵尊賢命其難廢形雖遺於軒冕蔭宜及於子孫乙貞以自居辟而不起鶴書莫顧雖忘卹後之心爵命已行寧闕賞延之典若使死無用蔭生不及榮何成旌善之風且是廢君之命場苗不食誠自絕於繫維葛藟有陰義難虧於燕翼請優後嗣以獎外臣

得江南諸州送庸調四月至上都戶部科其違限  
訴云冬月運路水淺故不及春至

賦納過時必先問罪淹卹有故亦可徵辭月旣及於正陽  
事宜歸於宰旅展如澤國蓋納地征歲有入貢之程敢忘  
慎守川無負舟之力寧免稽遲苟利涉之惟艱雖愆期而  
必宥地官致詰虛月其憂江郡執言後時可愍然恐事非  
靡鹽辭或憑虛請驗所屆公文而後可遵令典

得景爲縣令教人煮木爲酪州司責其煩擾辭云  
以備凶年



事不舉中有災寧救政或擾下雖惠何爲景念在濟時動  
非率法且煩人而不卹是昧烹鮮何歉歲以爲虞將勤煮  
酪信作勞於無用豈爲教之有方必也志切救災道敦行  
古周官荒政自可擇其善者新室弊法焉用尤而效之宜  
聽責言勿迷知過

得丁爲郡守行縣見昆弟相訟者乃閉閣思過或  
告其矯辭云欲使以田相讓也

化本自家政先爲郡禮寧下庶宜寬不悌之刑訓在知非  
是得長人之道况天倫不睦地訟攸與利方競於膏腴恩

難虧於骨肉教宜引古過貴自新雖聞爭以鬩牆有傷魯衛之政庶使愧而讓畔將同虞芮之風苟無訟之可期則相容而何遠推田以讓爾誠謝於孟光閉閣而思吾何慙於延壽宜嘉靜理勿謂矯誣

得甲獻弓蹲甲而射不穿一札有司詰之辭云液角者不得牛戴牛角

貫革乖方則宜致詰相角失理亦可徵辭甲奠體以成執簫而獻中規不撓六材雖則合三捨拔有愆七札不能穿一旦恐傷人之甲不曰堅乎而非戴牛之弓無自入也液

信虧於巧者射遂爽於臧今周典足徵彼自乖於三色楚君明試此無愧於二臣咎且有歸責之非當

得乙有同門生喪親將往弔之其父怒而撻之使遺嫌而已或詰其故云交道之難

子道貴恭當從理命交游重義蓋卹哀情孝不在於詭隨仁豈忘於惻隱乙父訓乖愛子道昧擇交况求益之初無友不如已者及居喪之際凡人猶合救之既罔念於一哀是有違於久要苟知生而不弔雖贈死以何爲舊館遇喪宣父尚猶出涕同門在戚王丹未可忘情縱申遺帛之誠

豈補贈芻之義肆一杖之怒父兮旣爽義方杜三諫之辭  
子也亦虧孝道宜哉或詰允矣知言

得轉運使以汴河水淺運船不通請築塞兩岸斗  
門節度使以當軍營田悉在河次若斗門築塞  
無以供軍

川以利涉竭則壅稅水能潤下塞亦傷農將捨短以從長  
宜去彼而取此汴河決能降雨流可通財引漕運之千艘  
實資積水生稻梁於一漑亦藉餘波利旣相妨用難兼濟  
節度使以軍儲務足思開竇而有年轉運司以邦賦貴通

恐負舟而無力辭雖執競理可明徵壅四國之征其傷多矣專一方之利所獲幾何贍軍雖望於秋成濟國難虧於日用利害斯見與奪可知

得景爲宰秋雩刺史責其非時辭云旱甚若不雩

### 恐爲災

居常授時政則行古恤人救弊道在從宜旱將害於棗盛雩難拘於秋夏景象雷是職不雨其憂苟旱魃之愆時虐旣太甚雖蓐收之戒序雩亦何傷冀有聞於鸛鳴庶無慮於狼顧馨香以感夕且望於月離稼穡其傷時難遵於龍

見雖事乖魯史而義合隨時製錦執言是亦爲政褻帷致  
詰未可與權

得丁爲郡歲凶奏請賑給百姓制未下散之本使  
科其專命丁云恐人困

臨邦賑乏情本由衷爲國救災美終歸上丁分條出守求  
瘼居心歲不順成人旣憂於二鬴公有滯積戶將餽以一  
鍾是輸濟衆之誠允叶分憂之政然以事雖上請恩未下  
流稍違主守之文遽見職司之舉使以未有君命何其速  
歟郡以苟利國家專之可也卹貧賑廩鄧攸雖見免官矯

制發倉汲黯不聞獲罪請宥自專之過用旌共理之心

得戊兄爲辛所殺戊遇辛不殺之或責其不悌辭  
云辛以義殺兄不敢返殺

捨則崇讐報爲傷義當斷友于之愛以遵王者之章戊居  
兄之仇應執兵而不返辛殺人以義將傳刃而攸難雖魯  
策垂文不可莫之報也而周官執禁安得苟而行之將令  
怨是用希實在犯而不校揆子產之誠損怨爲忠徵與駢  
之言益仇非智難從不悌之責請聽有孚之辭

得甲爲將以簞醪投河命衆飲之或非其矯節甲

曰推誠而已何必在醉

將主軍情酒存人欲推誠之義必在於均飽德之文不專於醉甲寄分外閫令出中權九醞投河義由獨斷一瓢飲水惠在同霑倘師人之多寒恩逾挾纊如戰士之載渴功倍望梅分少以表無頗和眾寧宜及亂豈資滿腹所貴歸心少卿絕甘見稱漢代子反獨醉實敗楚軍苟臧否之是由何古今之有異非其矯節是不知言

得乙有罪丁救以免乙不謝或責之乙云不爲已  
在公而行誠非爲已懷惠以謝則涉徇私彼旣求仁而得



仁此宜以直而報直乙惟獲戾丁乃解紛以爲非罪而拘  
冶長見稱於尼父直言以免叔向寧謝於祁奚論恩則邱  
山不勝在道而江湖可忘況情非私謁可以不愧於人義  
在公行實亦無求於我合嘉遺直勿聽貴言

得景妻有喪景於妻側奏樂妻責之不伏

喪則思哀見必存敬樂惟飾喜舉合從宜夫婦所貴同心  
吉凶固宜異道景室方在疚庭不徹懸鏗鏘無倦於鼓鐘  
好合有傷於琴瑟旣愆夫義是棄人喪儼麻縗之在躬是  
吾憂也調絲竹以盈耳於汝安乎如賓之敬頗乖若往之

哀斯瀆遂使唱和不應憂喜相干道路見縗猶聞必變隣里有殯亦爲不歌誠無惻隱之心宜受庸奴之責

得甲年七十餘有一子子請不從政所由云人戶

減耗徭役繁多不可執禮而廢事

役且有辭信非懋力老而不養豈謂愛親戀若阻於循陔怨必興於陟岵顧惟甲子及此丁年戶減事繁政宜勤於晝夜家貧親老養難闕於晨昏在子道而可矜雖王徭之宜免事聞諸禮情見乎辭天子敦風猶勸養其三老庶人從政亦何假於一夫况當孝理之朝難抑親人之請所由

之執愚謂不然

得景於逆旅食噬腊遇毒而死其黨訟之主人云

買之有處

生不可保死必有因盡知命於喪予豈尤人於食我景秋  
蓬方轉朝薤欲晞旅次爰來將受餐而已生涯溘盡當終  
食之間且非祭地之疑自是逢天之戚永言其黨不察所  
由死且焉知徒云噬腊之毒買而有處請無寘董之嫌誠  
虐士之可哀在主人而何咎幸思恕物無妄罪人

得詔賜百寮資物甲獨以物委地而不拜有司劾

金史卷一百一十二  
其不敬云本贓物故不敢拜

賜表主恩拜明臣禮苟臨事而不敬雖有辭而勿聽甲列  
在朝行頒其資物宜荷天而受賜何委地而如遺曾是姦  
賊誠可惡於清德今爲寵錫諒難拒於鴻私旣爲善而近  
名亦失恭而遠禮必也志疾貪冒節勵貞廉自當辭讓有  
儀豈得棄捐不拜況人不易物鍾離委珠而徒爲心苟無  
瑕伯夷飲泉而可爽宜許有司之劾用懲不恪之辜

得乙爲大夫請致仕有司詰其未七十乙稱羸病

不任事

時制未及尚可俟朝疾疢所加固難陳力乙位參食采志  
在懸車揆以紀年桑榆之光未暮驗其羸病蒲柳之質先  
零旣稱量力而行所謂奉身以退雖髮未種種告老無乃  
速歟而心旣諄諄致政固其宜矣請高知止無強不能

得景爲縣官判事案成後自覺有失請舉牒追改  
刺史不許欲科罪景云令式有文

政尚無寬過宜在宥苟昨非之自悟則夕改而可嘉景乃  
案察參諸簿領當推案務劇詎免毫釐之差屬褰帷政苛  
不容筆削之改誤而不隱悔亦可追縣無罔上之姦州有

刻下之虐先迷後覺判事雖不三思苟有必知牒舉明無  
二過揆人情而可恕徵國令而有文將欲痛繩恐非直筆  
得甲替乙爲將甲欲到乙嚴兵守備不出迎發制  
書勘合符以法從事御史糾其無賓主之禮科  
罪不伏

師律貴貞兵符示信苟未會合敢忘戒嚴乙奉中權甲承  
後命推輪相代言赴及瓜之期衷甲自防猶軫前茅之慮  
且信惟守器權在隱情符節旣未合同軍衛如何徹警所  
宜慮遠安可徇私闕於將迎雖乖主禮究其守備是叶軍

謀無責建牙恐非直指

得鄉老不輸本戶租稅所司詰之辭云年八十餘  
歲有頒賜請預折輸納所司以無例不許

月制旣登誠宜加惠歲賦不入何以奉公苟布常而是違  
雖移用而不可鄉老年參耆耄名繫版圖天賜未頒且有  
躁求之請地征合納非無苟免之心曾是徇私固難違例  
況時逢恤老節合勤王尚齒肆筵我歲敦於善養食毛入  
賦爾奚忘於樂輸受賜任待於時頒量入難虧於歲杪不  
從妄請誠謂職司

得乙女將嫁於丁旣納幣而乙悔丁訢之云未立

婚書

女也有行義不可廢父今無信訟所由生雖必告而是遵  
豈約言之可爽乙將求佳壻曾不良圖入幣之儀旣從五  
兩御輪之禮未及三周遂違在耳之言欲阻齊眉之請况  
卜鳳以求士且靡咎言何莫雁而從人有乖宿諾婚書未  
立徒引以爲辭聘財已交亦悔而無及請從玉潤之訢無  
過桃天之時

得景請與丁卜丁云死生付天不付君也遂不卜



或非之

聖人建易雖用稽疑君子樂天固宜知命苟吉凶之罔僭  
何臧否之足詢丁執心不回出言有中爾考前知之兆誠  
足決疑吾從昆命之文必先蔽志以爲禍福由已休咎則  
繫於慎行生死付天修短乃存乎陰陽當脫身於木雁寧  
問命於蓍龜言旣中倫理亦窮性况詹尹釋策有問焉知  
闔廉立言不疑何卜不從握粟是謂忘筌

得耆老稱甲多智縣司舉以理人或云多智賊也  
未知合用否

道雖棄智政且使能苟養之以恬則用之不惑甲稱予智  
縣舉爾知將老者之審才得賢斯美何或人之懵理爲賊  
是虞誠蔽蕩之無聞庶利仁之可取然以智殊小大用有  
否臧識若限於挈瓶或當害物道能宏於樂水何爽理人  
請審兩端方從一見

得乙爲邊將虜至若涉無人之地監軍責其無勇  
畧辭云內無糗糧外無犄角

封疆貴安伍候尚警苟不固吾圉則速卽爾刑乙登彼將  
壇鎮於邊壘誠可戒嚴走集罔有敵於我師何乃啟納寇

戎若無人於吾地是昧安邊之畧信貽失律之凶拳勇蔑  
聞罪戾誰執如或寇強師老食絕城孤期盡敵而還且勤  
於堅守苟知難而退猶愈於覆亡宜矜犄角之辭難議建  
牙之罪

得景進柑子過期壞損所由科之稱於浙江楊子  
江口各阻風五日

進獻失期罪難逃責稽畱有說理可原情景乃行人奉茲  
錫貢薦及時之果誠宜無失其程阻連日之風安得不愆  
於素覽所由之語聽使者之辭旣異遑寧難科淹恤限滄

波於于役匪我愆期販朱實於厥包非予有咎捨之可也  
誰曰不然

得丁喪所知於野張帷而哭鄰人詰云夫子惡野  
哭者

死喪有別哭泣從宜情或異於親疎禮則殊於內外丁義  
勤交道動循容止未忘半面嘗同傾蓋之歡永念重泉遂  
展張帷之哭雖聲非有慟而分止所知未乖夫子之言何  
致鄰人之詰如或肆號咷於路左物或惡之今則具威儀  
於野中禮無違者允符前志奚卹斯言

得甲妻於姑前叱狗甲怒而出之訴稱非七出甲

云不敬

細行有虧信乖婦順小過不忍豈謂夫和甲孝務恪恭義  
輕好合饋豚明順未聞爽於聽從叱狗愆儀盍勿庸於疾  
怨雖怡聲而是昧我則有尤若失口而不容人誰無過雖  
敬君長之母宜還王吉之妻

得乙爲軍帥昧夜進軍諸將不發欲罪之辭云不

見月章

表旗示信戎政貴明在九章而或乖雖三令而惟反乙是

稱戎帥未達軍容奉明罰之辭無聞月捷用潛師之計方  
事宵征徒欲董以爪牙曾不明其耳目況將經武必在昭  
文夜號未申有虞固宜不進月章莫舉毀匱自可當辜訢  
非失辭責乃當罪

一作過聽

得景嫁殤鄰人告違禁景不伏

生而異族死豈同歸且非合祔之儀爰抵嫁殤之禁景天  
婚是恤窀穸斯乖以處子之殤華遷他人之蒿里曾靡卜  
於鳴鳳各異室家胡爲相以青烏欲同宅兆徒念幼年無  
偶豈宜長夜有行況生死寧殊男女貴別縱近傾筐之歲

且未從人雖有遊岱之魂焉能事鬼旣違國禁是亂人倫  
請徵媒氏之文無抑鄰人之告

得丁陳計請輕過移諸甲兵省司以敗法不許丁  
云宥罪濟時行古之道何故不可

軍興事亟則務益兵時泰教成固難敗法丁志崇陳計識  
昧相時當兵戢之朝詎資凶器在刑行之日寧利幸人是  
廢國章欲崇軍實禍關黷武弊起惠姦宥罪未若慎行濟  
軍不如經國況王霸道異古今代變小哉管氏之器曾是  
行權舒矣省司之言孰非經久得失斯在用捨可知

得甲在獄病久請將妻入侍法曹不許訴稱三品

以上散官

獄雖慎守病則哀矜苟或無瘳如何罔詔甲罪抵刑憲身  
從幽繫憂能成疾膏肓之上未痊危則思親縲紲之中有  
請勢窮搖尾念切齊眉卧或十旬旣軫彌留之懼官惟三  
品宜從侍執之辭敢請法曹式遵令典

得乙聞牛鳴曰是生三犧皆用之矣問之皆信或  
謂之妖不伏

上稟天性旁通物情是謂生知孰云行怪况形雖異類心



則同歸四鳥分飛聽音旣稱有信三犧皆用聞鳴豈可爲妖且叶前言殊非左道爾惟不講我則有辭揆以周官業將同於夷隸詳夫魯史責不及於葛盧獸語可徵人言奚恤

得丁母乙妻俱爲命婦每朝參丁母云母尊婦卑請在婦上乙妻云夫官高不合在下未知孰是肅恭成德卑則敬尊著定辨儀賤無加貴眷彼母妻之品視其夫子之官敬將展於君前禮且殊於門內閨闈垂訓長幼雖合有倫朝廷正名等列豈宜無別婦道雖云守順

國章未可易班母則失言妻唯得禮且子令位下高欲宗  
子而夫也官崇如何卑我請依序守無使名愆

得景請預駙馬所司糾云景庶子也且違格令欲

科家長罪不伏

冒婚傲倖既抵官刑罔上失忠亦虧臣節在幼賤而不禁  
豈尊長之無辜屬下嫁王姬旁求都尉選吹簫之匹雖則  
未獲貞人預傅粉之郎豈可濫收庶子況姻連天族榮冠  
人倫詞既異於承祧禮難當於釐降掩藏庶孽唯慮其不  
諧貪冒寵榮詎思於有罪豈非或益而損曾是欲益而彰

國章寧捨於面欺家長宜從於首坐

得甲夜行所由執之辭云有公事欲早趨朝所由  
以犯禁不聽

趨朝有時則當蚤作防姦以法寧縱晨行雖夙夜之自公  
豈警巡之可犯甲陳力是念相時斯昧方鳴三鼓知行夜  
之猶嚴未闢九門信將朝而尚早趨進合遵於辨色夙興  
宜伺其啟明旣爽時然後行是必動而有悔非巫馬爲政  
焉用出以戴星同宣子俟朝胡不坐而假寐宜遵街禁用  
表司存

得郡舉乙清高廉使以爲通介無常罪舉不當郡  
稱往通今介時人無常乙有常也

退藏守道自合銷聲待用濟時則難背俗乙行藏未達通  
介不常若德至而無稱固難滅跡旣名彰而見舉誠合隨  
時徒立身以清高且於物而疑滯無固無必盍守宣尼之  
言獨清獨醒信貽漁父之誚兼濟豈資於絕俗全真未爽  
於同塵宜從不當之科俾慎無常之舉

得景於私家陳鐘磬鄰人告其僭云無故不徹懸  
器不假人易而生亂樂惟節事過則有刑禮旣異於古今

法且禁其鐘磬景苟求飾喜罔念速尤竊筍簋以陳樂由奢失僭金石而奏罪以聲聞雅當犯貴之辜難許徹懸之訴然恐賜同魏絳僭異於奚且彰非闕之恩何爽南鄰之擊是殊國禁無告家藏

得丁氏有邑號犯罪當贖請同封爵之例所司不許辭云邑號不因夫子而致

邑號旌賢國章議貴如或不能自庇則將焉用其封丁氏恩降閨門罪罹邦憲寵非他致旣因表以勲賢咎雖自貽亦可免於刑戮若不從其寬典則何貴於虛封漢卬緹縈

猶聞贖父齊分石筭豈不庇身宜聽輯矣之辭難奪贖兮  
之請

欽定全唐文卷六百七十三目錄

白居易 十八

得景與乙同賈景多收其利人刺其貪辭云知我  
貧也

得景夜越關爲吏所執辭云有追捕

得乙以庶男冒婚丁女事發離之丁理饋賀衣物  
請以所下聘財折之不伏

得乙在田妻餉不至路逢父告饑以餉饋之乙怒  
遂出妻妻不伏

得丁上言豪富人畜奴婢過制請據品秩爲限約  
或責其越職論事不伏

得甲爲邠州刺史正月令人修耒耜廉使責其失  
農候訴云土地寒

得乙掌宿息井樹客至不誅相翔者御史糾之辭  
云罪在守塗之人

得景爲私客擅入館驛欲科罪辭云雖入未供  
得洛水暴漲決破中橋往來不通人訴其弊河南  
府云雨水猶漲未可修橋縱苟施功水來還破



請待水定人又有辭

得景爲將敵人遺之藥景受而飲之或責失人臣之節不伏

得丁將在別屯士卒有犯每專殺戮御史舉劾訴稱曾受檠戟之賜

得甲告老請立長爲嗣長辭云不能請讓其弟或詰之云弟好仁

得甲出妻妻訴云無失婦道乙云父母不悅則出何必有過

得景有姊之喪合除而不除或非之稱吾寡兄弟不忍除也

得丁陷賊庭守道不仕賊帥逼之辭云堯舜在上下有巢許遂免所司欲旌其節大理執不許得景爲大夫有喪丁爲士而特弔或責之不伏

得吏部選人入試請繼燭以盡精思有司許之及考其書判善惡與不繼燭同有司欲不許未知可否

得乙貴達有故人至坐於堂下進以僕妾之食或

謂之乙曰恐以小利而忘大名故辱而激之也  
得景領縣府無蓄廩無儲管郡詰其慢職景云王  
者富人藏於下故也

得丁食於喪者之側而飽或責之辭云主人食我  
以禮故飽

得甲爲獄吏囚走限內他人獲之甲請免罪

得乙川游所由禁之云有故要渡

得景爲將每軍休止不繕營部監軍使劾其無備

辭云有警軍陣必成何必勞苦

得丁乘車有醉吐車茵者丁不科而吏請罪之丁  
不許

得甲牛觝乙馬死請償馬價甲云在放牧處相觝  
請備半價乙不伏

得景娶妻三年無子舅姑將出之訴云歸無所從  
得丁喪親賣宅以奉葬或責其無廟云貧無以爲  
禮

得甲之周親執工伎之業吏曹以甲不合仕甲云  
今見修改吏曹又云雖改仍限三年後聽仕未

知合否

得乙請用父蔭所司以贈官降正官蔭一等乙云  
父死王事合與正官同

得景爲錄事參軍刺史有違法事景封狀奏聞或  
責其失事長之道景云不敢不忠於國

得丁私發制書法司斷依漏洩坐丁訴云非密事  
請當本罪

得甲爲所由稽緩制書法直斷合徒一年訴云違  
未經十日

得乙盜買印用法直斷以僞造論訢云所由盜賣  
因買用之請減等

得有聖水出飲者日千數或謂僞言不能愈疾且  
恐爭鬪請禁塞之百姓云病者所資請從人欲  
得景有志行隱而不仕爲郡守所辟稱是巫家不  
當選吏功曹按其詭詐景不伏

得丁爲刺史見冬涉者哀之下車以濟之觀察使  
責其不順時修橋以徼小惠丁云恤下

得甲告其子行盜或謂其父子不相爲隱甲云大

義減親

得州府貢士或市井之子孫爲省司所詰甲稱羣  
萃之秀出者不合限以常科

得乙充選人職官選人代試法司斷乙與代試者  
同罪訴云實不知情

得甲與乙爵位同甲以齒長請居乙上乙以皇宗  
不伏在甲下有司不能斷

得選舉司取有名之士或云不息馳驚恐難責實  
得太學博士教胄子毀方瓦合司業以非訓導之

本不許

得甲居家被妻毆笞之鄰人告其違法縣斷徒三年妻訴云非夫告不伏

得乙居家理廉使舉請授官吏部以無出身不許使執云行成於內可移於官

得景定婚訖未成而女家改嫁不還財景訴之女家云無故三年不成

得丁爲大夫與管庫士爲友或非之云非交利也得四軍帥令禁兵於禁街中種田御史劾以無勅



文辭云因循歲久且有利於軍

得甲爲郡守部下漁色御史將責之辭云未授官  
以前納采

得乙爲三品見本州刺史不拜或非之稱品同

得景爲獸人冬不獻狼責之訴云秦地無狼

得景負丁財物丁不告官強取財物過本數縣司  
以數外贓論之不伏

得乙請襲爵所司以乙除喪十年而後申請引格  
不許乙云有故不伏

得丁爲士葬其父用大夫禮或責其僭辭云從死者

得甲將死命其子以嬖妾爲殉其子嫁之或非其  
違父之命子云不敢陷父於惡

欽定全唐文卷六百七十三

白居易 十八

得景與乙同賈景多收其利人刺其貪辭云知我  
貧也

仁無貪貨義有通財在潔身而雖乖於知己而則可景乙  
奇羸同業氣類相求競以錐刀始聞小人踰利推其貨賄  
終見君子用心情表深知事符往行如或貧富必類自當  
興讓立廉今則有無相懸固合損多益寡是爲徇義豈曰  
竭忠受粟益親孔氏用敦吾道分財損已叔牙嘗謂我貧

無畏人言俾彰交態

得景夜越關爲吏所執辭云有追捕

設以關防辨其出入旣慎守而無怠豈僞遊而能過景勤  
恪居懷夙夜奔命以謂寇攘事切宜早圖之罔思呵察戒  
嚴不可踰也萑蒲乃司敗小事襟帶實國家大防仰老氏  
之文雖知善閉稽周公之制尚曰不征責已具於有司理  
難辭於靡盬盍從致詰無信飾非

得乙以庶男冒婚丁女事發離之丁理饋賀衣物  
請以所下聘財折之不伏

婚以匹成嫡庶宜別訟由情察曲直可知將令人有所懲  
必在弊之不及隱其庶孽冒乃婚姻情以矯誣始聞好合  
事斯彰露旋見化離旣生非偶之嫌遂起納徵之訟詞多  
執競理有適歸乙則隱欺在法而聘財宜沒丁非罔冒原  
情而饋禮可追是非足明取與斯在

得乙在田妻餉不至路逢父告饑以餉饋之乙怒  
遂出妻妻不伏

象彼坤儀妻惟守順根乎天性父則本恩饌宜進於先生  
饒可輟於田駿夫也望深饁彼方期相敬如賓父兮念切

枵然旋聞受哺於子義雖乖於齊體孝則見於因心蓋嘉陟岵之仁翻肆送畿之怒執親是念難忘父一之言不爽可徵無效士二其行犬馬猶能有養爾豈無聞鳳凰欲阻于飛吾將不取

得丁上言豪富人畜奴婢過制請據品秩爲限約或責其越職論事不伏

品秩異倫臧獲有數苟踰等列是紊典常丁志在作程惡夫過制爰陳誠於白奏俾知禁於素封將使豪富之徒資雖積於鉅萬僮僕之限數無踰於指千抑滯義叶於隋時

革弊道符於漢日責其論事無乃失辭若守職而越思則爲出位將盡忠於陳計難伏嘉言楚旣失之鄭有辭矣

得甲爲邠州刺史正月令人修耒耜廉使責其失

農候訴云土地寒

教有權節業無易宜地苟異於寒溫農則殊於早晚甲分憂率職從俗勉人天時有常農宜先定地氣不類寒則晚成雖愆揉木之時未違把草之候正惟廉使何昧遺風縱稼器之已修先成焉用苟土膏之不起欲速何爲誠宜嘉乃辨方豈可詰其行古循諸周禮修耒雖在於季冬訓此

金定公集卷之三  
三  
函人于耜未乖於正月責則迂也訴之宜哉

得乙掌宿息井樹客至不誅相翔者御史糾之辭  
云罪在守塗之人

姦或不誅吏將焉用苟欲科其官失必先辨以司存乙慎  
守無聞庀徒有怠嘉賓戾止誠宜慮以相翔暴客聿來固  
合擒而勿佚旣隳官禁是縱公行且戒事之前不申嚴於  
聚柝慢官之後欲移過於守塗誠乖率屬之方宜甘責帥  
之罰然以官雖聯事等列或殊罪不同科重輕宜別比夫  
所屬請以異論



得景爲私客擅入館驛欲科罪辭云雖入未供

傳舍是崇使車攸處將供行李必辦公私何彼客遊欲從  
公食豈無逆旅宜受饋於盤飧旣匪使臣何苟求於館穀  
信饗餐而是啟寧僭濫之可容同周官之廬入宜銜命非  
鄭氏之驛置豈延賓法旣自干咎將誰任然則不應入而  
妄入刑固難逃而已供與未供罪宜有別請從減降庶叶  
科條

得洛水暴漲決破中橋往來不通人訴其弊河南  
府云雨水猶漲未可修橋縱苟施功水來還破

請待水定人又有辭

大水爲災中橋其壞車徒未濟誠有阻於往來修造從宜亦相時之可否顧茲浩浩阻彼憧憧人訴川梁不通壅而爲弊府慮水沴薦至毀必重勞苟後患之不圖則前功之盡棄將思濟衆固合俟時徵啟塞之文雖必葺於一日防懷襄之害未可應乎七星無取人辭請依府見

得景爲將敵人遺之藥景受而飲之或責失人臣之節不伏

軍尚隱情臣宜守道况握中權之要當絕外交之嫌景受

命建牙遇敵飲藥直雖可舉忠則不知且事君在公訓旅  
貴信失人臣之節爾豈自明惑士卒之心吾將安仰況兵  
惟尚詐人不易知同饋醪而無他推誠猶可苟流毒而不  
察雖悔寧追無謀既昧三思不伏恐涉貳過勿疑以飲徒  
徇陸抗之名未達而嘗且墜宣尼之訓是違師律難償隣  
言

得丁將在別屯士卒有犯每專殺戮御史舉劾訴  
稱曾受祭戰之賜

將非處右莫敢示威軍或別屯則宜專命丁位雖佐理分

以戎行執專征之權錫弓於周典操司獄之柄受檠於漢儀既有令而必行信無瑕而可戮實握兵之能政奚執簡之舉違如或稟命於連營畏子不敢今則分部而賜戟無我有違宜崇魏絳之威勿議秦彭之罪

得甲告老請立長爲嗣長辭云不能請讓其弟或詰之云弟好仁

讓賢雖仁廢長非順徒聞建善則理其如亂嗣不祥甲告老於朝立子爲後雖急難自舉必有可觀者焉而長幼以倫無所苟而已矣况欲正其爵位豈宜越以鴈行於弟克

恭厥兄徒見好仁之請知子莫若於父盍從立長之言無  
忌雖欲傳家季札終當棄室諒可致詰罔聽不能

得甲出妻妻訴云無失婦道乙云父母不悅則出  
何必有過

孝養父母有命必從禮事舅姑不悅則出乙親存爲子年  
壯有妻兆啟和鳴授室之儀雖備德非柔淑宜家之道則  
乖若無爽於聽從曷見尤於譴怒信傷婉婉理合此離且  
聞莫慰母心則宜去矣何必有虧婦道然後棄之未息游  
詞請稽往事姜詩出婦蓋爲小瑕鮑永去妻亦非大過明

徵斯在薄訴何爲

得景有姊之喪合除而不除或非之稱吾寡兄弟  
不忍除也

喪雖寧戚禮宜節哀俾不足與有餘必跂及而俯就景愛  
深血屬禮過時制與鮮兄之歎情旣鍾於孔懷及居姊之  
喪服將除而不忍雖志崇敦睦而事越典彝况儀貴適中  
哀不在外宜抑情而順變多奚以爲苟在禮而或踰過猶  
不及請遵仲尼之訓無執季路之辭

得丁陷賊庭守道不仕賊帥逼之辭云堯舜在上

下有巢許遂免所司欲旌其節大理執不許

臣節貴忠國經懋賞宜遵善道難廢彝章丁陷在賊庭強其祿仕敦在三之義因時難而名聞守無二之忠經歲寒而節見逼夷齊以周粟引巢許於唐臣身以道存情非利動所當厚獎何乃深疑且人無不臣之心所謂順也邦有惟重之典其可廢乎從亂則必論辜守道豈無旌善野哉大理信乃執迷展矣所司誠爲勸沮

得景爲大夫有喪丁爲士而特弔或責之不伏

官有常尊禮無不敬位若殊於等列弔則異其節文景爲

大夫丁乃元士居喪而哭合遵朝夕之期特弔以行奚越  
尊卑之序旣乖前典乃速斯言且禮貴明徵位宜慎守俟  
非其事信于食菜之榮儀失其宜徒展贈芻之意是曰無  
上將何以觀

得吏部選人入試請繼燭以盡精思有司許之及  
考其書判善惡與不繼燭同有司欲不許未知  
可否

旁求俊造迨將筮仕厯試文辭俾從卜夜苟狂簡而無取  
宜確執而勿聽萃彼羣才登於會府惟賢是急慮失寶於



握珠有命則從許借光於秉燭及乎考覈罕有菁英屬辭  
旣謝於揀金待問徒煩於繼火將期百鍊之後思苦彌精  
何意一場之中心勞逾拙曷如早已焉用晚成敢告有司  
勿從所請

得乙貴達有故人至坐於堂下進以僕妾之食或  
謂之乙曰恐以小利而忘大名故辱而激之也

貴賤苟合曾是汎交窮達相致乃爲執友乙旣登貴仕爰  
有故人以爲念舊追歡知己之心未至行權勵節成人之  
美則多不登夫子之堂乃進僕人之食苟推誠而相激雖

屈辱以何傷安實敗名重耳竟慙於子犯感而成事張儀  
終謝於蘇君是勉後圖且符往行如或識纔半面契未同  
心雖發憤以達人必取怨於謗已以斯致誚亦謂合宜

得景領縣府無蓄廩無儲管郡詰其慢職景云王  
者富人藏於下故也

賦斂異名君臣殊政藏諸百姓在王者而則然虛我千倉  
於職司而不可景匱茲國用豐彼家財人不誅求誠爲寬  
政府無儲蓄寧匪慢官况今征稅有常公私兼濟苟能取  
之以道則下自樂輸何必藏之於人使上將乏用旣爽奉

公之節宜甘掠美之科罔縱縣辭請依郡詰

得丁食於喪者之側而飽或責之辭云主人食我以禮故飽

飲食以陳庶無求飽齊衰可恤仁豈忘情丁靡念人喪姑求主禮遇加籩之膳誠可療饑對泣血之哀亦宜忘味旣念吉蠲之饌是忘惻隱之心况舂於其隣相猶違禮而食於其側飽亦非仁徒嘉施氏之儀且昧宣尼之教勿思變色當顧戚容

得甲爲獄吏囚走限內他人獲之甲請免罪

園土不嚴罪人其遁亡而由已誠曰慢官獲則因人其何補過相維彼甲所謂攸司不念恪居傲於姜里旋聞失守逸乃楚囚雖非故縱所爲曾是慢常而致徒稱勿佚未可塞違得於他人自是疎網無漏失其所職豈可出桺不科無貪假手之功固合甘心於罰

得乙川游所由禁之云有故要渡

示衆知防必修水禁救人鮮死無縱川游乙行險不思馮河無悔慕呂梁之術習於浮水違周官之令忘彼危身將不弔而是虞雖有故而宜禁忘子產喻政爾則狎而翫之

引仲尼格言吾恐蹈而死者既殊利涉當戒善游未可加刑且宜知懼

得景爲將每軍休止不繕營部監軍使劾其無備  
辭云有警軍陣必成何必勞苦

將苟有謀勞而後逸師不用律臧亦爲凶况未靖方隅尚勤征伐即戎推轂旣崇四七之名臨敵屯營何非什伍之列是使人慢孰謂戎昭薄威雖欲恤勞徹警恐爲懈怠且有嚴有翼猶奪先人之心不備不虞寧救長蛇之尾必也權能制勝謀必出奇亦待臨事有成然後斯言可信監軍

之効舉未失中彼景之辭試可乃已

得丁乘車有醉吐車茵者丁不科而吏請罪之丁  
不許

克寬克仁所謂易事不知不愠是曰難能況乎醉起甕間  
嘔盈車上小人沉湎自貽誚於彼昏君子含宏乃忘情於  
斯怒宥過所宜無大知非庶使有慙未乖觀過之仁雅叶  
諦思之義且恕當及物察貴用情絕纓繼淫醉而猶捨吐  
茵及亂誤豈不容無從下吏之規庶叶前賢之美

得甲牛觝乙馬死請償馬價甲云在放牧處相觝

請備半價乙不伏

馬牛於牧蹄角難防苟死傷之可徵在故誤而宜別況日  
中出入郊外寢訛既品量以齊驅或風逸之相及爾牛孔  
阜奮驛角而莫當我馬用傷踠駿足而致斃情非故縱理  
合誤論在阜棧以來思罰宜惟重就桃林而招損償則從  
輕將息訟端請徵律典當備半價勿聽過求

得景娶妻三年無子舅姑將出之訴云歸無所從  
承家不嗣禮許化離去室無歸義難棄背景將崇繼代是  
用娶妻百兩有行既啟飛鳳之兆三年無子遂操別鵠之

音將去舅姑終鮮親族雖配無生育誠合比於斷絃而歸  
靡適從庶可同於束蘊固難効於牧子宜自哀於鄧攸無  
抑有辭請從不去

得丁喪親賣宅以奉葬或責其無廟云貧無以爲

禮

慎終之道必信必誠死葬之儀有豐有省諒欲厚於卜宅  
亦難輕於慮居丁昊天降凶遠日叶吉思葬具之豐備欲  
祔九原顧家徒之屢空將鬻五畝愛雖深於送死義且涉  
於傷生念顏氏之貧豈宜厚葬覽子游之問固合稱家禮



所貴於從宜孝不在於益侈盍伸破產之禁以避無廟之嫌

得甲之周親執工伎之業吏曹以甲不合仕甲云  
今見修改吏曹又云雖改仍限三年後聽仕未  
知合否

業有四人職無二事如或居肆則不及仕門一作任甲爰有

周親是稱工者方恥役以事上且思祿在其中有慕九流  
雖欲自遷其業未經三載安可同升諸公難違甲令之文  
宜守吏曹之限如或材高拔俗行茂出羣豈惟限以常科

自可登乎大用以斯而議誰曰不然

得乙請用父蔭所司以贈官降正官蔭一等乙云

父死王事合與正官同

官分正贈蔭別品階如酬死繼之勲則厚賞延之寵追思  
乙父勵乃臣節捐軀致命尚克底定爾功繼代勸能豈忘  
勤卹我後椒聊旣稱有實桃李未可無陰忠且忘身優宜  
及嗣如或病捐館舍贈官當合降階今則死衛國家敘蔭  
所宜同正庶旌義烈用叶條章

得景爲錄事參軍刺史有違法事景封狀奏聞或

責其失事長之道景云不敢不忠於國

守位居常小宜事大持法舉正卑可糾尊景名署外臺身  
由中立直而自守郡郵之政必行明不相蒙州將之邪無  
隱且六條枉撓百事滋昏苟不提綱是爲漏網雖舉違犯  
上虧敬長之小心而陳奏盡忠得事君之大節旣非下訕  
難抑上聞

得丁私發制書法司斷依漏洩坐丁訴云非密事  
請當本罪

君命是專刑其無小王言非密罪則從輕丁乃攸司屬當

行下不慎厥德擅發如綸之言自災於身難求疎網之漏  
然則法通加減罪有重輕必也志在私行唯當專達之責  
如或事關樞密則科漏洩之辜請驗跡於紫泥方定刑於  
丹筆

得甲爲所由稽緩制書法直斷合徒一年訴云違  
未經十日

王命急宣行無停晷制書稽緩罪有常刑將欲正其科繩  
必先揆以時日甲懈位敗度慢令速尤蓄怠棄之心旣虧  
臣節壅駿奔之命自犯國章然則審時勾稽考程定罪法

直以役當期月所由以違未浹辰將計年以斷徒恐乖閱  
實請據日而加等庶叶公平是曰由文俾乎息訟

得乙盜買印用法直斷以偽造論訴云所由盜賣  
因買用之請減等

賄以公行印惟盜用罪之大者法可逃乎伊人無良同惡  
相濟所由旣敗官爲墨予取予求彼乙乃竊器成姦不畏  
不入潛謀斯露竊弄難容猶執薄言將求末減用因於買  
比自作而雖殊情本於奸與偽造而何異以茲降等誠恐  
利淫

得有聖水出飲者日千數或謂僞言不能愈疾且恐爭鬪請禁塞之百姓云病者所資請從人欲執禁之要在乎去邪爲政之先必也無訟訟彼泉水流於道周飲瓢之人孔多蔑聞病間濫觴之源不足必起爭端訟所由生欲不可縱上善未能利物左道足以惑人且稽以祥符徵之時事地不藏寶當今自出醴泉天之愛人從古未聞聖水無聽虛誕之說請塞訛僞之源

得景有志行隱而不仕爲郡守所辟稱是巫家不當選吏功曹按其詭詐景不伏

鳴鶴處陰聲聞于外元豹隱霧樂在其中此將適於退藏  
彼何強之維繫景業敦道行志薄宦情太守以舉爾所知  
將申蒲帛之聘夫子以從吾所好不顧弓旌之招懼俗吏  
之徒勞引巫家以自穢冀其言遜獲免翻以行詐論辜况  
商洛拂衣漢且求之不得潁川洗耳堯亦存而勿論天子  
尚不違情功曹如何按罪

得丁爲刺史見冬涉者哀之下車以濟之觀察使  
責其不順時修橋以徼小惠丁云恤下

津梁不修何以爲政車服有命安可假人丁職是崇班體

非威重輕漢臣之寵失位於高車徇鄭相之名濟人於大水志雖恤下道昧叶中與其熊軾涉川小惠未遍曷若虹橋通路大道甚夷啟塞旣闕於日修揭勵徒哀其冬涉事關失政情近沾名宜科十月不成庶辨二天無政

得甲告其子行盜或謂其父子不相爲隱甲云大

### 義滅親

法許原情慈通隱惡俾恩流於下亦直在其中甲忝齒人倫忍傷天性義方失教曾莫愧於父頑攘竊成姦尚不爲其子隱道旣虧於庭訓禮遂闕於家肥且情比樂羊可謂



不慈傷教况罪非石厚徒云大義滅親是不及情所宜致  
誚

得州府貢士或市井之子孫爲省司所詰甲稱羣  
萃之秀出者不合限以常科

惟賢是求何賤之有况士之秀者而人其捨諸惟彼郡貢  
或稱市籍非我族類則嫌雜以蕭蘭舉爾所知安得棄其  
翹楚誠其惡於稗敗諒難捨其茂異揀金於砂礫豈爲類  
賤而不收度木於澗松寧以地卑而見棄但恐所舉失德  
不可以賤廢人况乎識度冠時出自牛醫之後心計成務

擢於賈豎之中在往事而足徵可常科而是限州申有據  
省詰非宜

得乙充選人職官選人代試法司斷乙與代試者  
同罪訖云實不知情

官擇賢良選稽名實苟作偽而心拙必代斲而手傷乙情  
非容姦行乖周慎將如吾面遂充職以不疑未見子心果  
代試而有悔旣彰聞而貽戚乃連坐以論辜察情諒不同  
謀詰罪誠應異罰法無攸赦選者當准格論人不易知職  
官所宜情恕削奪恐爲過當貶降庶叶決平

得甲與乙爵位同甲以齒長請居乙上乙以皇宗  
不伏在甲下有司不能斷

庠序辨儀則先長長朝廷列位必尚親親惟彼周行是名  
同位德非心競禮失肩隨甲以桑榆年高何以卑我乙以  
葛藟族貴奚獨後予各與爭長之辭遂昧常尊之位然禮  
經尚齒且王室貴親晉鄭同儕信高卑之或等滕薛異姓  
諒先後之可知難遵少長之倫宜守親疎之序

得選舉司取有名之士或云不息馳驚恐難責實  
聲雖非實善豈無名不可苟求亦難盡棄屬時當側席任

重掄材思得士於聲華懼誘人於奔競若馳騫而方取慮  
非歲貢之賢儻寂寥而後求恐失日彰之善將期撫實必  
在研精但取捨不私是開乎公道則吹噓無益自閑其倖  
門名勿論於有無鑒自精於舉措

得太學博士教胄子毀方瓦合司業以非訓導之  
本不許

教惟馴致道在曲成將遜志以樂羣在毀方而和衆况化  
人由學成性因師雖和光以同塵德終不雜苟圓鑿以方  
枘物豈相容道且尚於無隅義莫先於不劇司業以訓導

貴別或慮雷同學官以容眾由寬何傷瓦合教之未墜蓋  
宣尼之言然文且有徵則戴氏之典在將勸學者所宜謹  
之

得甲居家被妻毆笞之鄰人告其違法縣斷徒三  
年妻訴云非夫告不伏

禮貴妻柔則宜禁暴罪非夫告未可麗刑何彼無良於斯  
有怒三從罔敬待以庸奴之心一杖所加辱於女子之手  
作威信傷於婦道不告未爽於夫和招訟於隣誠愧聲聞  
於外斷徒不伏未乖直在其中雖昧家肥難從縣責

得乙居家理廉使舉請授官吏部以無出身不許  
使執云行成於內可移於官

調選正名誠宜守序敷求懋德安可拘文乙積行於中闡  
彰於外廉使以道敦知己欲致我於青雲天官以限在出  
身將棄予於白屋事雖異見理可明徵掄瑣瑣之材則循  
舊格刈翹翹之楚寧守常科幸當側席之求無惑刻舟之  
執況自家刑國移孝入忠旣聞道不虛行足見舉非失德  
所宜堅決無至深疑

得景定婚訖未成而女家改嫁不還財景訴之女

家云無故三年不成

義敦好合禮重親迎苟定婚而不成雖改嫁而無罪景謀將著代禮及問名二姓有行已卜和鳴之兆三年無故竟愆嬀婉之期桃李恐失於當年榛栗遂移於他族旣聞改適乃訴納徵揆情而嘉禮自虧在法而聘財不返女兮不爽未乖九十之儀夫也無良可謂二三其德去禮逾遠責人斯難

得丁爲大夫與管庫士爲友或非之云非交利也見賢不稱且虧事上之節非義苟合則涉黷下之嫌丁貴

乃立家友其管庫不思進善徒務降尊若接而或非自貽  
交利之責儻知而不舉則速蔽賢之尤旣未覈於是非故  
欲紊乎貴賤况公叔薦士家臣尚見同升雖文子好能管  
庫不聞爲友信非慎守宜及或非

得四軍帥令禁兵於禁街中種田御史劾以無勅  
文辭云因循歲久且有利於軍

爲國勸農田疇有制示人知禁衢路攸先瞻彼三農藝斯  
五稼且町疇是務豈是瞻軍雖轍迹不加未爲曠土輦轂  
必資於平易康莊難縱以荒蕪務有畔之農秋成而利亦



蓋寡侵如砥之道歲久而弊則滋多請論環衛之非式表  
鐵冠之効

得甲爲郡守部下漁色御史將責之辭云未授官  
以前納采

諸侯不下用戒淫風君子好求未乖婚義甲旣榮爲郡且  
念宜家禮未及於結褵責已加於執憲求娶於本部之內  
雖處嫌疑定婚於授官之前未爲縱欲况禮先納采足明  
嫺婉之求聘則爲妻殊非強暴之政宜聽隼旗之訴難科  
漁色之辜

得乙爲三品見本州刺史不拜或非之稱品同

桑梓攸重必在恪恭官品斯同則宜抗禮乙班榮是踐威重可觀況衣錦還鄉已崇三品之秩雖剖符臨郡應無再拜之儀豈以州里版圖而桑邦家典制如或商周不敵敢不盡禮事君今且晉鄭同儕安得降階卑我旣不愆素何恤或非

得景爲獸人冬不獻狼責之訴云秦地無狼

鮮或不給旣曠乃官辭且無徵是重而罪景獸人斯掌禽獻罔供當路可求曾不思於鼃尾充庖爲用遂有關於去

賜既愆冬獻之期難償秋官之責載詳地產重振一作國核  
章薦必以時吾能言於周有生靡常所子勿謂其秦無縱  
口給之不慙在面欺而無捨

得景負丁財物丁不告官強取財物過本數縣司

以數外贓論之不伏

人縱於貪動而生悔物非其道取則有贓丁放利欲贏景  
逋債未償懷不忌而強取姑務豐財逞無厭之過求豈非  
黷貨情難容於強暴法必禁以奪攘以交易而求多尚宜  
准盜在倍稱而過數孰謂非贓若以律論當從縣斷

得乙請襲爵所司以乙除喪十年而後申請引格  
不許乙云有故不伏

爵命未墜嗣襲有期在紀律而或愆當職思而宜舉乙舊  
德將繼新命未加所宜纂彼前修相承以一子何乃廢其  
後嗣自棄於十年歲月旣已滋深公侯固難必復然以法  
通議事理貴察情如致身於宴安則宜奪爵若居家而有  
故尚可策名須待畢辭方期析理

得丁爲士葬其父用大夫禮或責其僭辭云從死  
者

禮惟辨貴孝不貶親是謂奉先孰云僭上丁慶加一命憂  
及三年凶降昊天且結茹荼之痛吉從遠日方追食采之  
榮既貴賤之殊宜亦父子之異道同曾元易簣正位於大  
夫殊晏嬰遣車見非於君子未爽慎終之義允符從死之  
文辭則有徵責之非當

得甲將死命其子以嬖妾爲殉其子嫁之或非其  
違父之命子云不敢陷父於惡

觀行慰心則稟父命辨惑執禮宜全子道甲立身失正沒  
齒歸亂命子以邪生不戒之在色愛妾爲殉死而有害於

人違則棄言順爲陷惡三年之道雖奉先而無改一言以  
失難致親於不義誠宜嫁是豈可順非况孝在慎終有同  
魏顥理命事殊改正未傷莊子難能宜忘在耳之言庶見  
因心之孝